

適園叢書

張宗祥



通國書香

吳昌碩



三國藝文志卷二

姚氏學

史之類十有三曰正史曰編年曰雜史曰史鈔曰史評曰故事曰職官曰儀制曰刑法曰雜傳記曰地理曰譜系曰簿錄
伏儼漢書音義

顏師古漢書敘例曰諸家注釋雖見名氏至於爵里頗或難知伏儼字景宏琅邪人

汪師韓文選理學權輿曰選注所引羣書有伏儼漢書音義

孫星衍建立伏博士始末伏氏世系曰始祖勝秦博士
史漢儒林並有傳九世湛光武時大司徒陽都侯十五
世完嗣爵女爲獻帝皇后完誅後國除十六世典十七

世嚴注云當作儼注漢書

按此世系嘉慶時鄒平貢生王啟運所敘也考范書伏湛

傳建武三年封陽都侯六年徙封不其侯又伏皇后紀后琅邪東武人父完襲爵不其侯爲侍中后既立遷執金吾建安元年拜輔國將軍儀比三司完以政在曹操自嫌尊戚乃上印綬拜中散大夫尋遷屯騎校尉十四年卒子興嗣初后與父完書言曹操殘偏之狀令密圖之完不敢發至十九年事乃露泄操追大怒遂偏帝廢后下暴室以幽崩兄弟及宗族死者百餘人母盈等十九人徙涿郡蓋自湛開國至興凡八世興爲曹操所殺國除世系稱陽都侯稱完誅後國除皆非也興典字形相近未詳孰是

按世系則儼乃伏完之孫孝獻皇后之姪與顏監稱琅邪人相符其人當在魏世或非本支或幸而得全其徙涿郡之十九人似皆婦女儼未必在內今史記漢書注中亦閒有伏儼說

劉德漢書注

顏師古漢書敘例曰劉德北海人

汪師韓文選理學權輿曰選注所引羣書有劉德漢書

注

按通典凶禮喪制篇凡六引劉德問田瓊首一條稱
後漢劉德餘多稱魏劉德鄭珍鄭學錄謂劉德是鄭
門弟子錢東垣校刊鄭志跋謂劉德是鄭氏門人蓋
以爲田瓊弟子也顏監云北海人則謂鄭氏弟子鄭
氏門人者實近似之

鄭氏漢書音義

顏師古漢書敘例曰鄭氏晉灼音義序云不知其名而
臣瓚集解輒云鄭德旣無所據今依晉灼但稱鄭氏耳

宋祁校語曰景祐余靖校本云鄭氏舊傳晉灼集注云

北海人不知其名而臣瓚以爲鄭德今書但稱鄭氏臣按

瓚引鄭德而爲顏氏所采者皆改

曰鄭故今本亦但見有鄭氏注

汪師韓文選理學權輿曰選注所引羣書有鄭德漢書

音義

此李善采臣瓚集解可知

侯志曰洪頤煊讀書叢錄云漢書集注有鄭氏臣瓚以

爲鄭德汴本史記索隱以爲鄭玄誤康按鄭氏旣在康

成後又在晉灼前

晉灼晉尚書郎

并用黃初改置郡縣名則爲

魏人無疑至康成之無漢書注本無可疑洪亮吉據史

記集解引鄭玄注數處謂漢書音義所稱鄭氏蓋康成

居多此晉灼臣瓚所未及言者後人能臆斷之乎十七

史商推云常熟毛氏索隱跋謂宋刻鄭德誤作鄭玄則裴駙集解亦宋人妄改其說近是

按晉灼臣瓚並在西晉灼不知鄭氏何名而瓚知之見聞不同事所恆有且瓚多見古書如漢茂陵書漢祿秩令爲江左所不傳者瓚皆見之其言鄭德必有所自又其書進之於朝必不致妄說以惑視聽特以注家姓名非本書宏旨故略而不詳顏監偏信晉灼其實瓚說可從也

李斐漢書音義

顏師古漢書敘例曰李斐不詳所出郡縣

汪師韓文選理學權輿曰選注所引羣書有李斐漢書

音義

李奇漢書注

顏師古漢書敘例曰李奇南陽人

汪師韓文選理學權輿曰選注所引羣書有李奇漢書

注

鄧展漢書注

顏師古漢書敘例曰鄧展南陽人魏建安中爲奮威將

軍封高樂鄉侯

魏志文紀注典論自敘有曰嘗與奮威將軍鄧展等共

飲宿聞展善有手臂曉五兵又稱其能空手入白刃余

與論劍良久云云

汪師韓文選理學權輿曰選注所引羣書有鄧展漢書

注又有鄧展子不知是否卽此鄧展附識於此不別出

文穎漢書注

顏師古漢書敘例曰文穎字叔良南陽人後漢末荊州從事建安中爲甘陵府丞

汪師韓文選理學權輿曰選注所引羣書有文穎漢書注

按侯氏志云建安非魏年號顏氏敘例稱魏建安中者蓋是時魏國已建鄧展文穎二人實爲魏臣非漢臣雖當建安時不得繫以漢也按漢魏之際凡記前代時事或曰漢或曰建安從無建安之上加以魏字

者

文選東方畫贊序稱魏建安中李善已斥其誤

此或采之魏書魏略魏武

本紀等見書中有初平興平建安紀年遂誤以爲魏

顏氏錄舊文不加更正是其一失亦何至如侯氏之

曲說乎

張揖漢書注一卷

揖始末見經部小學類

顏師古漢書敘例曰張揖止解司馬相如傳一卷

宋高似孫史略曰司馬相如一傳最難注張揖曾作博

雅通於名物所以止注此傳

汪師韓文選理學權輿曰選注所引羣書有張揖漢書

注又曰文選舊注中有張揖子虛賦注上林賦注

蘇林漢書注

林始末具經部孝經類

魏志劉邵傳注魏略儒宗傳曰林博學多通古今字指凡諸書傳文閒危疑林皆釋之

顏師古漢書敘例曰服應曩說疏索尙多蘇晉眾家剖斷益尠

汪師韓文選理學權輿曰選注所引羣書有蘇林漢書注

按魏略言諸書傳危疑林皆釋之則所注釋者必多今惟此及孝經二種自魏晉中經簿錄亡而後漢三國人之書遂堙沒不可見

張晏漢書注

顏師古漢書敘例曰張晏字子博中山人

汪師韓文選理學權輿曰選注所引羣書有張晏漢書注

洪亮吉曉讀書齋雜錄曰張晏漢書注於地理最詳

如漳漢書注

顏師古漢書敘例曰如漳馮翊人魏陳郡丞

汪師韓文選理學權輿曰選注所引羣書有如漳漢書

注

孟康漢書音義九卷

顏師古漢書敘例曰孟康字公休安平廣宗人魏散騎

侍郎弘農太守領典農校尉勃海太守給事中散騎常

侍中書令後轉爲監封廣陵亭侯

魏志杜恕傳注魏略曰黃初中康以於郭后有外屬并受九親賜拜遂轉爲散騎侍郎是時散騎皆以高才英儒充其選而康獨緣妃嬙雜在其閒故於時皆共輕之號爲阿九康旣無才敏因在冗官博讀書傳後遂有所彈駁其文義雅而切要眾人乃更加意正始中代杜恕爲弘農太守康之始拜眾人雖知其有志量以其未嘗宰牧不保其能也而康恩澤治能吏民稱歌焉

隋書經籍志梁有漢書孟康音義九卷亡唐經籍志漢書音義九卷孟康撰藝文志孟康漢書音義九卷

項昭漢書注

顏師古漢書敘例曰項昭不詳何郡縣人

按顏氏敘例具列諸家注釋皆以時代爲先後自伏
儼至此凡一十三家在應劭之後韋昭之前則皆爲
三國時人侯志於伏儼劉德李斐李奇張晏項昭六
家置不入錄蓋以顏氏不言魏人之故未免不充其
類歟

韋昭漢書音義七卷

昭始末見經部詩類

隋書經籍志漢書音義七卷韋昭撰唐經籍志漢書音

義七卷韓韋撰

此作韓韋
寫誤也

藝文志韋昭漢書音義七卷

汪師韓文選理學權輿曰選注所引羣書有孟康韋昭

漢書注

惟項昭一家
選注引未見

諸葛亮漢書音一卷

蜀志本傳亮字孔明瑯琊陽都人漢司隸校尉諸葛豐

後也

豐漢書有列傳

父珪字君貢漢末爲太山郡丞亮早孤從

父玄爲袁術所署豫章太守玄將亮及亮弟均之官會

漢朝更選朱皓代玄玄素與荊州牧劉表有舊往依之

玄卒亮躬耕隴畝時先主屯新野潁川徐庶曰諸葛孔

明者臥龍也將軍宜枉駕顧之先主詣亮凡三往乃見

於是情好日密及曹公敗於赤壁先主收江南以亮爲

軍師中郎將成都平爲軍師將軍署左將軍府事先主

卽帝位策爲丞相錄尙書事假節領司隸校尉後主建

興元年封武鄉侯開府治事領益州牧政事無巨細咸

決於亮十二年八月卒於軍時年五十四遺命葬漢中

定軍山謚忠武侯

唐書藝文志諸葛亮論前漢事一卷又音一卷通志藝文略漢書音一卷諸葛亮撰高似孫史略漢書諸葛亮音一卷

按張澍輯諸葛集目錄云澍按隋書經籍志漢書音一卷蜀丞相諸葛亮撰亦見唐志又故事制作篇亦云然今檢隋志實無此文

疑合論前漢事爲一編而隋志遺之

張休漢書章條

吳志孫登傳魏黃初二年以權爲吳王是歲立登爲太子權欲登讀漢書習知近代之事以張昭有師法重煩勞之乃令張休從昭受讀還以授登

吳志張昭傳昭少子休字叔嗣弱冠與諸葛恪顧譚等俱爲太子登僚友以漢書授登注引吳書曰休進授指摘文義分別事物並有章條登甚愛之常在左右

休後至揚

武將軍坐事徙交州又以譖賜死時年四十一

按吳書言並有章條則非徒憑口說其必筆之於書

可知顏師古漢書敘例載晉劉寶侍皇太子講漢書

別有駁義卽此之類亦略如後世講義

凡歷朝臣工進講皆別具

講義知此制自魏晉已然矣

而張子布父子漢書有師法亦於此

見之

右注釋凡一十六家

東觀漢記先賢表